

30
29. febr. **Brjef landshöfðingja til amtmannsins í norðuramtinu og austuramtinu um sjerstaka manntalsþinghá fyrir Jökuldalshrepp.** — Samkvæmt tillögum yðar, herra amtmáður, í þóknanlegu brjefi, dagsettu 28. jan. þ. á. veiti jeg hjermeð samþykki mitt til, að Jökuldalshreppur megi eptirleiðis vera manntalsþinghá út af fyrir sig með þingstað á Skjöldólfsstöðum, með því skilyrði, að hlutaðeigandi hreppsnefnd sjái svo um, að nægilegt húsrúm fáið þar til þinghaldsins. Leyfi þetta hefur ekki í för með sjer neina breytingu á hinni fornu Fossvallaþinghá sem dómsþinghá.

Þetta tilkynnist yður hjermeð til þóknanlegrar ráðstöfunar og frekari birtingar.

31
29. febr. **Brjef landshöfðingja til stjórnar landsbankans um gjöf til búnaðarfelags Suðuramtsins af varasjóði sparisjóðs Reykjavíkur.** — Í þóknanlegu brjefi dags. 17. þ. m. hefur stjórn landsbankans skýrt frá því, að hún hafi afráðið að veita búnaðarfelagi suðuramtsins að gjöf 6000 kr. af varasjóði sparisjóðs Reykjavíkur, er var, þannig að 5000 kr. af þessari upphæð sjeu lagðar við höfuðstól fjelagsins, en að 1000 kr. verði varið nú þegar til einhverra bráðnaudsynlegra fyrirtækja eða til undirbúnings undir þau, og hefur bankastjórnin jafnframt beiðst samþykkis míns til þessarar ráðstöfunar.

Út af þessu vil jeg hjermeð veita samþykki mitt til þess að ofan nefndu búnaðarfelagi verði veittar 6000 kr. að gjöf af varasjóði sparisjóðsins, en þó ætlast jeg ekki til að neitt af þessu fje verði lagt við höfuðstól fjelagsins, heldur að því sje varið til einhverra þeirra fyrirtækja, til eflingar landbúnaði, er bankastjórnin og stjórn búnaðarfelagsins verða ásáttar um, að nauðsynlegt og æskilegt sje, að framkvæmd verði sem fyrst.

32
29. febr. **Brjef landshöfðingja til sýslumannsins í Húnavatnssýslu um skoðun á jarðabótum búnaðarfelaga.** — Með þóknanlegu brjefi dags. 5. þ. m., hafið þjer, herra sýslumaður, gjört fyrirspurn um, hvort nauðsynlegt verði, að jarðabætur þær, sem búnaðarfelögin í sýslu yðar hafi látið gjöra næstlíðið sumar og sem þegar eru skoðaðar og skráðar eptir því sem fyrirskipað hefur verið að undanförnun, verði endurskoðaðar á næsta vori eða sumri af skoðunarmönnum þeim, sem sýslunefndin væntanlega nefnir til þess starfa í vetur.

Út af þessu skal yður hjermeð þjónustusamlega tjáð, yður til þóknanlegrar leiðbeiningar, að svo framarlega sem skýrslur skoðunarmannanna um ofangreindar jarðabætur fullnægja skilyrðum þeim, sem sett eru í auglýsingu minni í 25. tölublaði Stjórnartíðindanna f. á., um skilyrði og reglur fyrir styrkveitingu úr landssjóði til búnaðarfelaga, að öllu öðru leyti en því, að skoðunarmennirnir hafi verið til þess nefndir af sýslunefndinni, þá er eigi nauðsynlegt, að ný skoðunargjörð sje látin framfara á optnefndum jarðabótum, en annars verður ný skoðun að fara fram, til þess að fjelögin geti orðið styrksaðnjótandi.